

I'uleo O Le MALUA PAPAPA



Tala mai le Kolisi Faa-Faifeau i Malua / News from Malua Theological College; Lomiga XLI - Me 2019

TALOFA LAVA!

E muamua lava ona faafoi le viiga ma le faafetai i lo tatou Atua Tolu Tasi Paia ona o lea foi ua taitai malu mai le soifua mauuluga o lana Ekalesia aua le Fonotele o lenei tausaga 2019. Ae ou te faatalofa faafeiloai atu i le Suafa Mamalu o Iesu Keriso le Ao o le Ekalesia i le afifio mai, susu mai, talaaao mai, ma le faamaloulou mai o le Ekalesia mai lava i mauga tetele seia oo i ona mauga iti. Talofa Lava!

E faateleina foi le faamalo i le paia o le Ekalesia ao alo i faatofalaiga aemaise o le tofa saili aua le manuia alu i luma o lana Ekalesia. E momoli ai le faamalo i le Taitaifono ma le Laulau a le Fonotele. Faamalo i le tapuaiga mau a le Komiti o le Au Toeaina, faapea le nofo a Komiti ma le maave lasilasi o le paia o sui usufono filifilia o le Fonotele 2019. Malo le tauata'i! Faafetai le sailimalo mo le Atua ma lana Talalelei!

Tau ina ia avea lenei vaitau taua o le afio ifo o le Agaga Paia e toia ma aualitiia ai la outou tofa saili ma le faautautaga mau aua lava le Ekalesia ma ana fuafuaga alu mamao mo nei ma a taeao.



Susuga Ma'afala Limā FS
Pule o le Kolisi

Ae ua manino foi pine o lenei Fonotele mo le Kolisi Faafaifeau e pei ona iai. Ua faauuina ai Filemoni Crawley o le faiaoga o le Kolisi ma lona faletua o Alofa e avea ma Faifeau Samoa (FS). O lea foi ua patipatia e le Fonotele le faaeaina o nisi o Tama o le Ekalesia ua 'Tautai A'e' a latou faatamasoaliiga i le galuega a le Atua: Tautiaga Senara (FT) Taitaifono o le Fonotele, sui o le Komiti o Malua, ma le faletua ia Olita; Lucky Slade (FT), Sui o le

Komiti o Malua ma le faletua ia Terri; Tanielu Mamea (FT), sui o le Komiti o Malua ma le faletua ia Feu. Ua faamalo fai o le faiva!

Ua faafetai! Ua faafetai! Ua malie mata e vaai. Aua lo outou soifua auauna sa tauivi ai i le filiga ma le onosai faapalepale o 'vaaiga ia o le Agaga o le Atua.'

E faafetaia ai foi le susuga i le Faifeau Faiaoga Dr Tavita Maliko ma le faletua ia Mileneta i lo oulua sao taua ao galulue ai i le Kolisi. Ia faamanuia le Atua.

Ao lenei lomiga masani a le Maluapapa, aua lava se silafia e le Ekalesia ma le aufaitau o le lotoifale o lana Kolisi Faafaifeau.

Ia manuia tele taualumaga o le Fonotele a le Ekalesia Faapotopotoga Kerisiano Samoa, manuia foi la outou faitau ma le silasila.

Ma'afala

Ma'afala Limā FS
PULE O LE KOLISI

SILASILA I TOTONU

Talofa Lava! - Susuga Ma'afala Limā	1	Tautai A'e	6
Amatalia Galuega Kolisi	2	Galuega Faaleleia o le Uati	7
Faiaoga Fou - Melepone Isara / Tupe	2	Motu le Pa ae ua Iloa	8
Faauga Samasoni Moleli	2	Malua Journal 2019	9
Fa'au'uga Aoga Tusi Paia Malua 2019	3	Aoaoga a le Fanau	10
Tatala Aloaia "Ia Viia Lou Suafa"	3	Taaloga Aoao	11
Faamavaega ma Dr. Tavita Maliko	4	Atinae a le Kolisi	12
Sootaga (Kanana Fou, Piula ma Malua)	5	Faamuli Tausaga Muamua	13
Faauga Faifeau Samoa /	6	Fale Fou I Malua	13
Filemoni & Alofa Crawley		Vaaiga Lautele I le Kolisi	14-15

AMATALIA GALUEGA A LE KOLISI 2019

O le Aso Lulu 30 Ianuari 2019 i le itula e 12 i le aoauli, na toe amatalia ai galuega fa'aauau a le Kolisi Fa'afaifeau i Malua. Sa molimauina i le laumua a le Ekalesia, le ulufale mai o le toatele o a'oa'o, faletua, ma a latou fanau auā le toe amatalia o a'oa'oga mo lenei tausaga. E to'a 26 a'oa'o ma faletua e to'a 18 o le tausaga muamua, sa amataina lo latou soifua a'otauina mo le galuega a le Atua i le Kolisi i lea aso. O lea fo'i sa ulufale mai i le Kolisi i lea aso, faletua e to'a lua ua fa'aopoopo mai i le vasega fa'aiuso, ina ua mae'a o latou aso fiafia sa faia i le taimi o le tuuaga umi. E to'atasi le faia'oga fou ua taliaina e le Komiti o Malua i le galuega fa'afaiaoga o le susuga ia Melepone, ma le faletua ia Tupe. Sa a'oa'oina i laua i le Kolisi Fa'afaifeau o le Pasefika i Fiji (PTC, 2017-2018) ma sa fa'amanuiaina i le fa'aailoga o le Master of Theology (Distinction).

O le itula e 7 i le afiafi o lea aso, sa faia ai le sauniga aloaia a le Kolisi e amata ai ana galuega mo lenei tausaga. Sa ta'ita'i e le susuga i le Ta'ita'ifono o le Komiti o Malua lea sauniga, le susuga i le Toeaina ia Tavita Anesone (FT), i le fesoasoani ai o le susuga i le Failautusi o le Komiti o Malua, le susuga i le Toeaina ia Iosefa Uilelea (FT). E to'atele nisi o Tamā o le Ekalesia ma o latou Faletua, susuga i Toeaina Penisione ma o latou Faletua, fa'apea le Auaigaluega a le Atua, o aiga ma uo a le Kolisi, sa auai atu i le sauniga taua mo le kolisi. O le upu lava a le Atua sa fai ma ta'imua ma fa'alototele ia i latou ua fou mai i le Kolisi, fa'apea ma latou ua toe fa'aauau le a'otauina mo lenei tausaga.

Sa fa'ai'uina lea po i se taumafataga na tapenaina e le Kolisi mo susuga i Toeaina, le Pule o le Kolisi, Sui Pule, faiaoga ma faletua, aemaise o aiga, uo, ma e masani. O lo'o fa'alagolago pea i le Agaga o le Atua auā galuega fa'aauau a le kolisi mo lenei tausaga, ina ia fa'atumanuia ai pea le viiga o le Atua.

FAIAOGA FOU - MELEPONE & TUPE ISARA



Susuga Melepone ma Tupe Isara.

O le tausaga nei na amatalia ai le auunaga faafaiaoga a le Susuga ia Melepone Isara ma le Faletua o Tupe i le Kolisi. Sa tofiaina e le Komiti o Malua i lana fonotaga i le amataga o le tausaga nei e galulue i le Kolisi ina ua faaiuina i le manuia le taumafai sa feagai ai i le Kolisi Faafaifeau a le Pasefika poo le Pacific Theological College i Suva, Fiti. O le Susuga ia Melepone na faamanuiaina i le faailoga o le MTh Distinction i Suesuega i le Feagaiga Tuai i le tausaga 2018. Ua galue nei o ia i le Matagaluega a le Feagaiga Tuai e le gata mo le Kolisi i Aoa ma Faletua ae aofia ai foi ma le Aoga Tusi Paia a Malua.

UA MALIE TOA! UA MALO TAU!

Ua sa'aoti le utu a le faimea ma ua atoa lio foi le masina ina ua ae manuia le faatamasoaliiaga e ala i le soifua aoaoina i atunuu mamao. Ao se lagona me'eme'e foi o le Ekalesia aoao faapea le susuga i le Alii Pule ma le Faletua ma le Kolisi ina ua tuuina aloaia le faailoga o le PhD (Suesuega o le Feagaiga Tuai) i le faifeau faiaoga ia Samasoni Moleli Alama mai le University of Divinity i



Melani Keilani (FS), Dr. Moleli, Viliamu Finau (FT)

Ausetalia, e ala i lona faauuga sa faataunuuna i le aso 23 o Mati 2019.

Sa auai ai i lenei aso fiafia le Susuga i le Toeaina ia Viliamu Finau e fai ma sui o Tamā o le Ekalesia e molimauina lenei aso taua. Sa auai foi le Susuga ia

Melani Keilani (FS ma sui o le Au Lotu sa auai ai le Susuga Moleli ma lona aiga ao aumau ai i Melepone. Na faapea foi ona auai le Faletua ia Malavai Moleli faapea le fanau, o aiga, uo ma e masani e patipatia lenei faamoemoe taua ua iu ma le manuia.

O le Susuga ia Dr. Samasoni Moleli o loo faapea foi ona ia umia faailoga o le BTh mai Malua ma le MTh with honours mai le Lunivesite lava lenei mai Melepone. O le ulutala o le tusiga a le faiaoga e faapea, "Jabez in Context: A Multidimensional Approach to Identity and Landholdings in Chronicles."

O loo galue nei o ia i le Matagaluega o le Feagaiga Tuai i le Kolisi i Malua faapea ai ma le Aoga Tusi Paia a Malua.

E toe momoli ai le faafetai ma le faamalo i le susuga i le faiaoga ia Dr. Samasoni Moleli ona o le faaeaea i le tapuaiga a le Ekalesia aoao, le Alii Pule ma le Kolisi i Malua. Ae le gata i lea o le nofo tatalo ma le tapuaiga a aiga, matua, faifeau faapea aulotu. Malo le tauvii, ua faamalo le fai o le faiva.



Dr. Samasoni Moleli, Malavai & Fanau

FA'AU'UGA LONA IX AOGA TUSI PAIA MALUA 2019

O le Aso To'ona'i 16 Mati 2019 sa fa'ataunu'uina ai le Faauuga Lona IX a le Aoga Tusi Paia a Malua i le Fale Iupeli i Malua. O lenei fa'au'uga ua ausia ai foi ni matatia fou o lenei aoga. Muamua, o le fa'au'uga muamua lea a le Aoga Tusi Paia ua fa'ataunu'uina i le Fale Iupeli fou. Lua, o le fa'au'uga fo'i lea ua fa'au'u fa'atasi ai i latou mai ona lālā e lua mai Salelologa i le motu i Salafai fa'atasi ai ma i latou i Apia i Upolu. O le aofa'i o le Aufa'au'u e 41; 28 sa fa'au'uina i le Tusi Pasi i Mataupu Silisili, 9 i le Tipiloma i Mataupu Silisili, ma i latou e to'a 4 sa ausia le Tusi Pasi faapea ma le Tipiloma.

O se fiafiaga sili o lea aso, ona ua tau lau o le faamoemoe o le Aufa'au'u. O le Afioga i le Taitaifono o le Komiti o Malua le Susuga i le Toeaina ia Tavita Anesone sa ia ta'itaia lenei sauniga mamalu. Sa lagolagosua i ai le Failautusi o le Komiti o Malua, le Susuga i le Toeaina ia Iosefa Uilelea i le faitauina o le Tusi Paia, faapea ma le Susuga i le Toeaina ia Asotasi Gu Time sa saunia talosaga. Sa apoapoa'i le taitai i le Aufa'au'u e ala i Afioga Paia a le Atua ma lana upu fa'amafanafana, ina ia fa'aogaina le tomali ma le iloa mai lenei aoga e avea ai i latou ma faata'ita'iga lelei i totonu o aiga, ekalesia fa'apea fa'alapotopotoga ma matagaluega a le Malō o lo'o galulue ma tautua ai.

Sa saunoa le Susuga i le Alii Pule o le Kolisi i Malua, le Susuga ia Ma'afala Limā, o le Pule foi lea o le Aoga Tusi Paia



Vasega Fa'au'u 2019

Sa matagofie mea uma o lea aso sei'a oo lava ina faai'uina i le Tatalo Faamanuia sa saunia e le Susuga i le Taitai, le Toeaina ia Tavita Anesone. O le agaga o le faafetai ma le fia faane'ene'eina pea o le Atua ona o lenei faamoemoe sa faataunu'uina i le manuia.

Ia manuia tele le usugafono a le Ekalesia i lenei tausaga! Ia faaalila pea le Mana o le Silisili Ese!

Faafetai.


Latu Latai (So'oupu o le Aoga Tusi Paia)

SILASILA I LE ITULAU 16 MO LE LISI

TATALA ALOAIA LE LOMIGA FOU O LE 'IA VIIA LOU SUAFA' O LE TUSI FAILOTU A LE EKALESIA FAAPOTOPOTOGA KERISIANO SAMOA

O le Aso Faraile 17 o Me, o le vaiaso muamua o fonotaga a le Ekalesia 2019, na faalauiloa aloaia ai le toe iloiloa o le tusi "Ia Viia Lou Suafa" i lona lomiga fou. O lenei galuega e tusa ai ma le molimau a le Susuga Iosefa Uilelea (FT) o le Failautusi o le Komiti a le Au Toeaina, pe a ma le sefulu tausaga o taumafai mai ai. Lenei ua faaiuina i le manuia ona o le alofa o le Atua. Tausa foi e le Toeaina ia Uilelea, le toatele o i latou na fai sao i lenei lomiga fou. O le lisi o ia Tama ma faifeau o loo lomina i totonu o le tusi. Sa faaleoina ai foi le agaga faafetai i le Alii Pule o le Kolisi, Maafala Lima ma le aiga faiaoga i lo latou sao i le faaliliuina o lenei tusi i le Gagana Peretania. Aua o lenei tusi ua iai nai suiga mai le tusi tuai sa iai. O se tasi lava lenei o suiga tele o lenei lomiga fou o le iai lea o le Gagana Peretania o le faagasologa o sauniga lotu. Faatasi ai ma faasologa o faigalotu o saofai, aso fanau, ma isi.

Na amataina lenei sauniga faapitoa i le faigalotu na faia i le Fale Tapuai o le Kolisi (Iupeli 2) i le itula e 10 i le taeao. Na taitaia lava e le Taitaifono o le Komiti a Tama o le Ekalesia, Tavita Anesone (FT). Na saunia e le Failautusi o le Komiti a le Au Toeaina ia Iosefa Uilelea (FT) le tala o le galuega faapea ai



ma talosaga, ao le upu folafola na saunia lava e le Taitaifono.

O le autu lava o le faamalosiua a le Taitai o le agaga faafetai i le Atua ona ua tino mai lenei galuega tele.

Faapea ma le toe faamanatu mai o le taua o lenei tusi ma lona faaaogaina e le aufaigaluega faifeau ina ia mulimulitai iai.

Na faaleoina ai foi le faafetai ia i latou uma na tofua sao i lenei galuega e aofia ai e ua maliliu ma ua malolo mai foi i le galuega faafaifeau e ala i le penisione malolo. E aofia ai foi le faafetai ia i latou o galulue pea i le galuega a le Ekalesia aemaise ai ma le Alii Pule ma le Kolisi mo lo latou foi sao.

O le tau o le tusi e \$100 Samoa ma o le fuafuaga ina ia tasi le tusi mo le faifeau e faatino ai lana galuega. O tusi uma e maua mai i le Ofisa o le Komiti a le Au Toeaina e ala i le Failautusi a le Komiti. Ua faatulagaina lenei tau ona o se tusi ua matua lelei ona lolomiina, faapea lona tuufaatasia.

O le naunautaga lava, ia mafai e lenei tusi ma lona faaaogaina, ona atagia ai le igoa ua faaigoaina ai, "Ia Viia Lou Suafa". Ia viia ai le Suafa o le Alii i le faatinoga o lana galuega.

SUEGA ULUFALE 2019

FEAGAIGA TUAI: IOSUA

FEAGAIGA FOU: LUKA

FAAMAVAE ATU LE KOLISI IA REV. DR. TAVITA & MILENETA MALIKO

O upu masani a le atunuu, e faigofie ona faatalofa ae faigata ona faamavae. O lagona ia o le Alii Pule ma le Faletua faapea le Kolisi i le po na faamavae atu ai i se tasi o faiaoga sinia o le Kolisi, le susuga ia Dr Tavita Maliko FS ma le Faletua ia Mileneta ma le fanau. Ao le upu foi ua masani ai i aso faapenei, o le faaiuga o se galuega, o le afuaga ma le amataga lea o le isi foi faamoemoe taua. Ae o tofiga a le Atua, e ao lava ona faalologo i ai le tagata le auga. I le tualuga ai o aoaoga ma galuega o le kuata muamua a le Kolisi o lenei tausaga, na faia ai le aiga faaleaiga a le Kolisi e faamavae atu ai i le susuga i le Faifeau Fomai Faiaoga ia Tavita ma le Faletua ia Mileneta Maliko ma le nofoaalo ina ua valaauina e avea ma Faafeagaiga a le EFKS i Lepa. O le Susuga i le Faifeau Faiaoga ia Makesi Neemia na fai ma fofoga o le Kolisi e faaleoina le faafetai i nei auaua i lo laua sao taua ao galulue ai i Malua nei. O le Faletua ia Torise Neemia sa faaleoina le faafetai ma le meaalofo mo le Faletua ia Mileneta e fai ma sui o le Faletua o le Alii Pule ia Lalokava Limā ma le mafutaga a Faletua o faiaoga ma aoao i lena po matagofie. Na tualuga lena po i fiafia na saunia e le Kolisi, ae na mataina foi fiafia o le po lea ina ua faafiafia ai le ausiva a alo ma fanau a le susuga ia Maliko ma le Faletua e ala i siva faaonapo nei.

O le susuga i le Faifeau Fomai Faiaoga ma le Faletua na tofia e le Komiti o Malua i le faiva faafaiaoga i le Kolisi mai le tausaga e 2013 seia oo



mai i le taimi nei. Na tautua o ia i le Matagaluega a le Mataupu Silisili faapea ai foi ma le Matagaluega o le Faiva Alofilima o le Mataupu Silisili. E le gata i le Kolisi i Malua ae faapea ai foi ma le Aoga Tusi Paia a Malua. E tele foi ona agavaa sa faaogaina e fesoasoani ai i isi galuega a le Kolisi. Sa avea ma Media and Communication

person a le Kolisi faapea ai foi ma Komiti tumau o le autalo Tagapolo a le Kolisi. O le faafetai i le Atua ona o taimi sa galulue faatasi ai ma le susuga ia Maliko ma le Faletua ia Mileneta e ala i lana faasoa i agavaa ma le silafia i Mataupu Silisili aemaise ai lona sao taua i ona faiva o le aoao atu ina ia tapenaina ai le afaigaluega faaolioli aua le Atua ma lona finagalo paia. Sa maua le avanoa e saunoa ai le Faiaoga ma le Faletua i lea po. O le agaga lava ua faatumulia i le faafetai ma le faamalo, faapea foi lagona misia o le mafutaga ma le Alii Pule ma lona Faletua faapea le Kolisi. Na saunoa ma tali fuaitau le Alii Pule e faafetaia ai le Faafeagaiga ma le Faletua ona o laua sao taua ma le aoga ao feagai ai ma le faiva faafaiaoga.

Moomooga alofa mai le Maluapapa ia utupupuina pea le tofa ma le silafia e le Agaga Paia ao foufou i le isi laasaga fou o le soifua auaua e ala i le tofiga o le Faafeagaiga Tausi nuu i le EFKS i Lepa. Ia faamanuia le Atua i lau susuga i le Faafeagaiga, le Faletua ma le nofoaalo i le galuega o faatalitali mai.

MAFUTAGA AOAO MA FALETUA

O le ā lē toe tafocina faapefoe lelava, le paia sausaugata o Samoa, Ae ā le paia o le Ekalesia i ona tulaga faalupe. Auā e lē opopo i sa matou faamatalaga. Ae le itiiti le agaga faafetai, i le susu o lau Susuga i le Alii Pule ma le Faletua, Le Paia o le Aiga Faiaoga ma Faletua. Ona o avanoa ua filifilia ai o ma tagata faatauva e avea ma Peresetene ma le Failautusi o le mafutaga a A'oa'o ma Faletua i lenei tausaga.

I le kuata muamua sa lelei lava ma sologa lelei mea uma. Manuia uma A'oa'o o Faletua ma Aiga.

Leai se A'oa'o na faaletonu pe tupu ai se faalavelave, na pau lava o le lē masani i le tau fesuisui ai o si o tatou Atunuu.

Ao le tulaga i aoaoga o taaloga ma galuega, e lagona lava le faagaetia loloto ona o le filiga ma le

galulue faatasi, ao le fiafia e faatino ai soo se auaua.

Talosia ia le agalelei o le Atua ia tumau ai pea lona agalelei i fanau talosia, ina ia saga faamaite ai pea le fia fai mea sili, ina ia viia ai pea lona suafa e faavavau.

Ma ia saga faaosofia pea moegaluaga i fanau a le Ekalesia e faaauau ai le ola aotauina i lenei foi kuata ua savalia, ae a lenei tausaga.

Manuia tele le feagai ai o lo tatou Ekalesia ma le Fonotele.

Ulatifa Leuluai (Peresetene)
Penitala Kolose (Failautusi)

MAFUTAGA A LE USOGA: KOLISI FAAFAIFEAU MALUA, PIULA, MA KANANA FOU



O le Aso Gafua 25 Mati seia o'o i le Aso Tofi 28 Mati o le tausaga nei, sa faataunuaina ai le Mafutaga a le Usoga o Kolisi Fa'afaifeau o Malua, Piula, ma Kanana Fou, i le laumua o le Ekalesia Fa'apotopotoga Kerisiano i Amerika Samoa (EFKAS) i Kanana Fou, Amerika Samoa. O se valaau aloaia a le Susuga i le Alii Pule (poo le Peresitene o le Seminare) faapea ma le Kolisi Fa'afaifeau i Kanana Fou, mo Susuga i Alii Pule faapea ma Kolisi Fa'afaifeau i Malua ma Piula ina ia fa'atasi atu mo lea Mafutaga taua. O se tofa fo'i na a'e i Susuga o Alii Pule o Kolisi Fa'afaifeau o le Mafutaga, ina ia toe fa'aolaola ai se feso'otaiga lelei ma le mafanafana, aemaise

lava mo le Aufaigaluega a le Atua o lo'o a'otauina mo lana Talalelei. O le tausaga 2001 o loo gata mai ai le Mafutaga a Malua ma Kanana Fou i le laumua i Amerika Samoa. O le manulauti o le mafutaga mo lenei tausaga, **'O le Tatou Piitaga i le Gafa o le Atua'**.

O le Tapuaiga amata mo le Mafutaga a le Usoga, sa saunoa ai le Susuga i le Taitaifono o le Komiti Au Toeaina EFKS, Susuga i le Toeaina Tavita Anesone FT i lana lauga aami ma se pepa na saunia lelei, ma tatala aloaia ai le Mafutaga. O aso na soso'o ai sa faia ai fetufa'iga fa'aleagaga ma fa'asoa ai mafaufauga eseese agai le manulauti o le Mafutaga. Sa tali leleia le Mafutaga a le Usoga e le laumua i Kanana Fou, i taumafataga eseese i aso uma, faapea ma apitaga sa vaevaeina ai le aumalaga mai Malua ma Piula. E to'a 97 le aumalaga a Malua, e aofia ai le Alii Pule ma le Faletua, Sui Pule ma le Faletua, Faiaoga ma Faletua, faapea A'oa'o ma Faletua o le Tausaga Fa ma le Tausaga Tolu. O Piula e to'a 88 lo latou aumalaga. Sa tapenaina e le Komiti mo le Mafutaga (Malua) pepa malaga ma pemitua uma mo le aumalaga a Malua, i le fesoasoani ma se feso'otaiga lelei a le Komiti mo le Mafutaga i Kanana Fou, ma le



Ofisa o le Kovana i Amerika Samoa. Sa fetuunai foi taimi ma aso malaga mo le saogalemu ai o le aumalaga uma o le Mafutaga a le Usoga, i le faaagaina o le auunaga a le Samoa Airways.

O le afiafi o le aso lona lua o le faamoemoe sa molimauina ai e le Mafutaga a le Usoga faafiafiaga matagofie a le EFKS Youth Ierusalem Fou i Tafuna, a le Susuga i le Faafaegaiga Alapi Eti FS ma le Faletua ia Teuila. Sa faafiafia ai fo'i i lea afiafi le EFKAS Petesa Uta, le Susuga Tusi Seanoa FT. O le toe aso o le faamoemoe sa faia ai le Tapuaiga e fa'ai'u aloaia ai le Mafutaga, ma saunoa fa'amanuia ai le Susuga i le Toeaina Fiti Aofia FT, Taitaifono Komiti Au Toeaina EFKAS. Ona sosoo ai lea ma Fa'afiafiaga a Kolisi Fa'afaifeau taitasi, e fa'auma ai le Mafutaga a le Usoga. O fa'afiafiaga foi ia sa taumafai ai se meaalofo seleni a le Mafutaga a le Usoga 2019, mo le 50th Jubilee Celebration a le SPATS (South Pacific Association of Theological Schools) o le a faia i le faaiuga o lenei masina (28-31 Me, 2019).



O le fa'amoemoe ua taunuu, o le laau lea o le soifua. O se faatofalaiga sa feagai ai ma le Mafutaga a le Usoga mo lenei tausaga, o lea ua a'e ma le manuia, aua sa tapuaia e Tama o le Ekalesia, faapea ma nisi o le Kolisi sa faamuli ma tatalo atu ina ia manuia. Tatou olioli ma viia le Atua, ona ua taunuu lenei faamoemoe taua. A o le manatu laualuga o le fa'atasiga e pei ona sa i ai le Mafutaga a le Usoga mo lenei tausaga, ina ia fealofani, ma feso'otai lelei le Aufaigaluega a le Atua o loo aotauina e talai le Talalelei ia Keriso. Ia viia le Atua ona o lona alofa, ma lona agalelei! Manuia le Fonotele a le Ekalesia mo lenei tausaga.

Faafetai,
Komiti mo le Mafutaga a le Usoga 2019 (Malua)
Alesana & Lemau Pala'amo
Seumaninoa & Neda Puaina
Karanita & Elena Petaia



FAAUUGA FAIFEAU SAMOA (FILEMONI CRAWLEY MA ALOFA)

O le Aso Toonai 18 o Me, 2019 na faataunuaina ai le sauniga lotu faapitoa i le malumalu o “O LE FALE IUPELI” e faauuina ai faifeau ma faletua e toa sefulu ma le tolu. O i latou ua agavaa mo le tautuaina o le Upu ma le Sakarameta a le Atua e ala i le galuega faafaifeau o le EFKS. O lenei faamoemoe na faauuina ai se tasi o le auso galulue i le Kolisi i Malua, le Susuga ia **Filemoni & Alofa Crawley** Filemoni Crawley ma le Faletua o Alofa. Ua atoa i ai le tolu tausaga o auauna ai i le Ekalesia e ala i le galuega faafaiaoga i le Kolisi Faafaifeau i Malua.



Sa faaiuina lo la taumafai mai le Pacific Theological College i le 2016 ma tofiaina ai loa e le Komiti o Malua e fai ma faiaoga i le Kolisi. O lea la ua atoa le taimi e galulue ai ona agavaa ai lea

mo lenei faamoemoe taua e pei ona faatulaga

mai e le Ekalesia mo ana faifeau. Ao se faamoemoe foi e taulai uma I ai le vaai a le aufaigaluega ofoina mo le Atua ma ana feau.

O le Susuga i le Faifeau Faiaoga ia Filemoni o loo faiaoga i le Matagaluega o le Faiva Alofi Lima o le Mataupu Silisili (Practical Theology Department) e le gata i vasega a Aoao ma Faletua, ae faapea foi i le Aoga Tusi Paia a Malua. O le Faletua ia Alofa o loo fesoasoani tele i aoga a fanau a Malua. E le gata i le avea ai ma Faiaoga Aso Sa, ae o loo fesoasoani foi i le Malua Study Centre i meaaoga a fanau matutua. O loo galue foi i le faalapotopotoga a le malo e taua o le SIFA.

Na vaaia lava le fialia o aiga, o uo, ma aumeamamae a i latou uma na faauuina i lea aso. Aua o le taunuuga lea e atoatoa ai le avea ma faifeau o le Upu ma le Sakarameta a le Atua e pei ona naunau ma fia faaogaina ai le soifua mo le Atua ma lona finagalo.

O moomooga alofa lava o le Alii Pule, Faiaoga ma le Kolisi atoa ia faamanuia le Atua i le Susuga i le Faifeau Faiaoga ma le Faletua mo lea foi laasaga taua o le soifua tautua i le Atua.

TAUTAI A'E

Tautai A'e-Faauga o Faafeagaiga mai le Galuega Tausi Aulotu

A a'e se faatautaiga i le vasa, ona sili lea o ofe a tautai. O le viiga lea ma le faafetai, ao se faapolo ma se faasagi i le Atua na siitia ae i le Aso Lulu, 22 o Me, 2019 ina ua aloaia ai le malolo mai ai o nisi o Tamā ma Tinā o le Ekalesia mai le galuega faafaifeau sa gapatia ai i le tele o tausaga. O Toa manumanu nei o le Talalelei na faalele e Aiga, Nu'u ma Ekalesia aua le Atua ma Lona finagalo.

O lenei sauniga lotu faapitoa sa taitaiina e le Sui Taitaifono le Susuga i le Toeaina ia Tunumoso Iosia ma ua aloaia ai le penisione malolo o i latou nei; *Tautiagi Senara (FT) ma Olita Senara o le Matagaluega Aana, Tanielu (FT) ma Feu Mamea o le Matagaluega Manukau, Lucky (FT) ma Terri Slade mai le Matagaluega Aukilani, Utufua (FT) ma Taiaopo Naseri Mai le Matagaluega Apia, Poka (FT) ma Malo Maua o*

le Matagaluega Aana, Kaleve (FT) ma Tausunu Leifi o le Matagaluega Faasaleleaga, Faitamai (FS) Lupeulufua Leota mai le Matagaluega Amerika, Litala (FS) ma Levei Tuimaualuga o le Matagaluega Niusaelese, Vaimoso (FS) Filiata Apineru o le Matagaluega Niu Sila i Saute, Laneselota (FS) ma Mere Opetaiia mai le Matagaluega Faasaleleaga, Sileli (FS) ma Mere Tauaifaiga mai le Matagaluega Ituotane.

E faapitoa ai se faamatalaga i Susuga i Toeaina, Tautiagi Senara, Tanielu Mamea faapea Lucky Slade ma o latou Faletua, aua o nisi nei o sui aupito i leva o le Komiti o Malua. Malo le galulue faafetai faasoa aua le agai i luma o galuega ma tiute fai a le Kolisi. Sa outou fautua ma timai faatamā ao alofaiva le Susuga i le Alii Pule ma Faiaoga o le Kolisi tautua i le Atua ma Lona Finagalo Paia. Tautai A'e. Ua outou tau lava le taua lelei ma ua outou manumalo ai. Lea ua faaeaina outou e le Atua. Mapu ane loa ma le fialia ma ia manuia tele le feagai ai ma faiga malologa.



Susuga Lucky & Terri Slade FT



Susuga Tautiagi & Olita Senara FT



Susuga Tanielu & Feu Mamea FT

GALUEGA FAALELEIA O LE UATI



Na goga uma ma faalologo le Maluapapa ina ua toe faalogoina le tatagi lelei o logo o le Uati Tele o loo i luga ae o le Fale Mafutaga. O se aso fiafia tele i le Kolisi i Malua nei aemaise lava le Alii Pule ma le Kolisi atoa ina ua mafai ona toe faalogoina le pao a le logo o le Uati e faailo ai taimi e pei ona sa masani ai mai le amataga. O se tasi lenei o galuega sa sa'afi i ai ma tau faataoto lona faatinoga e le Ekalesia Aoa faapea le Alii Pule ma le Kolisi, ao lea ua taunuu i manu ma ua toe faaleleia, aua o le Uati sa fai ma faailo taimi ia Samoa pe a malaga mai Sisifo ma Sasae.

O lenei galuega toe faaleleia o le Uati sa pasiaina lava i le Fonotele a le Ekalesia, ae na mafai ona faatino ma molimauina le toe lelei atoatoa i lenei Fonotele, ina ua ofoina mai le fesoasoani a se alii inisinia faapitoa i ituaiga Uati nei mai Ausetalia, le susuga ia Tim Trecey. Saunoa Tim ua le o toe tele ni Uati faapea i lenei itu o le lalolagi, ma o le ala naunau lea e ofoina lona tomai ina ia toe faaleleia

lenei aseta taua a le Ekalesia ma le Kolisi. I le faatautaiga ma le silasila totoa a le Alii Pule ma le Sui Pule o le Kolisi, faapea le galulue malosi o aoao sa fesoasoani i le alii palagi, na mafai ai ona tuuina ifo i lalo totoga uma o le Uati ma lafo i Ausetalia mo galuega toe faaleleia.

E tolu masina sa galue ai le alii inisinia ma toe lafo mai ai loa i Samoa nei vaega uma ua pei lava o ni vaega (parts) fou mo le toe faapipiina. Sa lafoina (air freight) totoga o le uati ui ina taugata, peitai o le faamoemoe lava ia vave faafoi mai mo lona



faapipiina ao lei usuia le Fonotele. Saunoa foi Tim ua suia vae tuai o le uati ona o vae tuai e fai sina mamafa ma na pau ia o vaega na suia. Ao feagai ai le alii inisinia ma le faaleleia o vaega uma o le uati, ao le taimi lea sa galulue ai foi le Kolisi e ala i le faatautaiga a le Alii Pule, Sui Pule ma faiaoga faapea aoao e toe faafou le tauluga ma totonu atoa o le fale o le uati (tower). Na faaalua foi finagalo o le Alii Pule, Sui Pule ma nisi o uso matutua o le aiga faiaoga faapea, talu lava ona i ai i le Kolisi sa lei faalogoina lava se leo o le logo o le uati lenei, peitai o lea ua le gata ua i ai le leo o le logo, a ua matagofie vaega uma.

Na maofa le alii inisinia ina ua sii i lalo e aoao le pusa na aumai ai totoga o le uati, aua o lana molimau e mamafa tele le pusa ma e na o lifi sa fesiitai ai i Ausetalia. O se galuega na faia lava i le loto atu o aoao e

fesoasoani i le alii inisinia aua ua iloa e nei aoao o lo latou lea taeao mo le Ekalesia ma le Kolisi. Sa toe auai mai lava si alii o Tim ina ia faapipii ma faasino lelei faiga o le uati ma lona faatonutonuina. Pe a ma le lua aso sa toe fetuutuunai ai le faasologa o galuega ina ia mautinoa le tumau o le sao o taimi e tatagi ai le logo o le uati, aua o se faailoilo taua lava, e le gata mo le Kolisi i ana galuega ma aoaoga i aso fai soo, ae faapena foi ona tua i ai le atunuu femalagaai pe a moomia le taimi sao. Lea la ua silasila i ai le paia lasilasi o le Ekalesia ma le Fonotele, ua toe atoa ma ua lelei le Uati mo le Ekalesia ma le atunuu.

Ina ua maea lenei galuega, sa maua se avanoa e mafuta ai i se aiga faaleaiga a le Kolisi ma le susuga ia Tim Trecey ona o lona sao taua tele ua pogai ai ona toe ola lelei le uati. Sa ia faaleoina foi le agaga faafetai tele ona o le lafofoga fiafia ma le loto talimalo a le Alii Pule ma le Faletua faapea le Kolisi. O se laolao foi na faaleoina ai le faafetai tele a le Alii Pule ma le Kolisi ia Tim ona o avanoa le au maua ma le taua, ua toe mafai ai ona molimauina i o tatou foi taimi e le gata mo le Ekalesia ao le Kolisi le leo malie o le uati na te faailoa mai taimi o le aso. Sa saunia ai foi e le Faletua o le Alii Pule ia Lalokava Limā ma le mafutaga a Faletua Malua ni meaalofo matagofie ona o sasa lava o le loto faafetai ina ua tini taunuu le faamoemoe.

E avea ai lenei avanoa e momoli ai le faafetai ma le faamalo i le Ekalesia aoao e ala i lana Fonotele ona o le faatofalaiga ina ia toe faaleleia lenei meatotino taua. Faafetai foi i le Alii Pule ma le Kolisi ona o le faatinoina ma le fuafuaina o le faasologa o lenei galuega ao lei usuia le Fonotele o lenei tausaga. E le faagaloina foi le faamalo ma le faafetai i le susuga i le alii Ausetalia ia Tim Trecey ona o lona sao taua ua toe ola ai le Uati i Malua nei. Ia viia pea le Atua i galuega lelei ua faia.

MOTU LE PA AE UA ILOA

SUI USUFONO A LE KOLISI MO LE FONOTELE 2019

O le Susuga i le Faifeau Faiaoga ia Dr Arthur Wulf o le sui usufono lea a le Kolisi i le Fonotele o lenei tausaga 2019. O ia foi sa saunia le pepa a le Kolisi mo lenei Fonotele ua faaulutalaina e faapea, "O le Atua ma Malo Faalelalogagi o i le Mataupu e Fitu o le Tusi o Tanielu." O le faauigaina o le faaaliga na vaaia e Tanielu i le mataupu e fitu, ma le fesootaiga ma malo tetele na pulea le lalolagi i ia ona po. Aemaise le pule aoao a le Atua i le faagasologa o le Talafaasolopito o le lalolagi ma lona aao faatonutonu i ia pulega faalelalogagi. Faatasi ai ma se fesootaiga o lenei faaaliga i le feagai ai o le Ekalesia EFKS ma le va ma malo o nei foi ona aso.

VALAAUINA LE PULE O LE KOLISI MO FAIGALOTU E AMATA AI TAUALUMAGA O LE FONOTELE

O se tasi lenei o pine o lenei Fonotele 2019 mo le Kolisi Faafaifeau i Malua. Ua tofiaina ai le Alii Pule ia Maafala Lima (FS) na te saunia le faigalotu e amata ai taualumaga ole Fonotele, Aso Lulu 22 Me, 2019. O se avanoa faaauuro mo le Alii Pule e tomatauina ai foi le Fonotele ao feagai ai ma fetufaiga aua se manuia o le Ekalesia mo nei ma a taeao.

FONOTAGA A LE OBSA (Oceanic Biblical Studies Association - Faalapopotoga o Suesuega i le Tusi Paia o le itulagi o Atumotu) FAIA I SUVA, FITI 2019

O fonotaga a lenei faalapopotoga e tai lua tausaga ma faia. E faasolo lava i atunuu o lenei itulagi faaatumotu o loo iai o latou sui i lenei faalapopotoga. O le 2019 na faia ai i Suva, Fiti i le faatautaiga a le Aoga Faafaifeau a le Ekalesia Metotisi i Fiti o Davuilevu Theological College. Ae na faataunuina i le laumua o le Aoga Faafaifeau a le Pasefika poo le Pacific Theological College i Suva i lo latou apitaga e taua o le Jovili Meo Mission Centre.

Na faagasolo lenei fonotaga mai le Aso 18 Aperila e oo i le 20 Aperila 2019. E tolima sui faiaoga a le Kolisi na auai ma saunia ni pepa mo lenei fonotaga. O le manatu autu o lenei fonotaga o le "Bible and Vanua" (poo le fanua i le faaSamoa). O le aotelega lava o lenei fonotaga ia taumafai tagata atumotu e faaoga a latou foi tu ma aga, poo faaupuga ma alagaupu, e tau faauigaina ai le Tusi Paia aemaise le fesootaiga ma le fanua poo elele. O mataupu ogaoga lava o le Suiga o le Tau, Aafiaga o tina ma tamaiti i sauaga mataga ma isi faamamafa na tele ai folasaga. O le manatu laualuga o lenei faalapopotoga, o le faaagaina o nei faitauga

faaatumotu e faigofie ai ona malamalama tagata atumotu i le Tusi Paia.

O se mafutaga ua lagonaina e sui o Malua na auai lona taua aemaise lava mo le galuega o le faauigaina o le Tusi Paia ma le folafolaina o le finagalo o le Atua.

O le fonotaga lava lenei na filifilia ai le susuga i le faifeau faiaoga ia Dr Vaitusi Nofoaiga mai Malua e taitaifono ma le sui o Siaatoutai e fai ma failautusi a le OBSA mo le 2019 seia oo i le 2021.

O le isi fonotaga e sosoo ai o le a faia lea i Toga (Siaatoutai Theological College) i le 2021. Ao le 2023 o le a talimalo ai le Seminare a Kanana Fou i Amerika Samoa.

AOAOGA E UIGA I ILOILOGA O GALUEGA A SUI AUAI O AOGA FAAAUUAU SA FAIA I LE IUNIVESITE AOA O SAMOA, OLOAMANU CENTRE I PAPAIGALAGALA, VAIVASE TAI.

O lenei aoaoga sa faatautaia e faiaoga o le Oloamanu Centre a le Iunivesite Aoao o Samoa i lona laumua i Vaivase Tai, Papaigalagala Ocean Side. Sa faataunuina i le Aso 6 seia oo i le Aso 10 o Me. O le faamamafa o lenei aoga, o iloilogaga (Assessment) o galuega a sui auai o aoaoga faaauau mo tagata matutua (Adult Learning). O le faamoemoe ina ia mafai ona saunia e faiaoga o nei aoga faaauau ni blueprints (mamanu o taiala) e faavae ai le iloilogaga (togiina) o faatinoga a sui auai ina ia atagia ai sini ma faamoemoe o mataupu taitasi.

O faifeau faiaoga ia Dr Alesana Pala'amo ma Makesi Neemia na fai ma sui o le Kolisi mo lea aoaoga. Molimauiina e nei sui le taua o lenei aoaoga mo le au faigaluega galulue faiaoga i Malua nei o lenei aoaoga aua lava le iloilogaga o faatinoga a Aoao ma Faletua o le Kolisi.

AOAO MAI ISI EKALESLIA O LE PASEFIKA

O loo faaauau pea le ofi mai o aoao mai isi Ekalesia o le Pasefika mo le aotauina i le Kolisi i Malua nei. O le taimi nei o loo iai sui mai le Kiribati Uniting Church e toalua, o Aratibin Mikaere ma Kaititi Tokaia. O i laua o loo i le vasega faaiuasoo ma o loo iai i le faailoga o le BD with Honours. E toafa e mai le Ekalesia Kelisiano Tuvalu. O i latou nei o Moeava Mausali ma Peniata Laulau (Tausaga 3), Pio Galo ma Tefiliga Fatu (Tausaga 1). E faapea foi le Ekalesia Faapotopotoga Kelisiano Tokelau e tolima o latou sui o iai nei. O Maka Galuega, Ken Titi ma le faletua o Temisa (Tausaga 3), lafeta Vaopuka, Peoni Lapana ma le faletua ia Sela (Tausaga 2), ma le aoao ia Lafoga Moelau (Tausaga 1).

FAAIPOIPOGA A LE KOLISI I LE TUUAGA UMI NA TUANAI ATU NEI



**Geoffrey & Daphne
Fuimaono**

E lua faaiipoipoga a le Kolisi na feagai ai ao iai i lana tuuaga o le Kerisimasi o le 2018 ma le Tausaga Fou 2019. O le aso fiafia o le Aoao Faaiuso ia Tautofi Tuivasa ma le faletua ia Annie Tuigamala na faataunuuina i Aukilani Niu Sila, i le Ekalesia EFKS a Ranui. Na faataunuuina leni osiga feagaiga i le Malumalu o le EFKS Te Atatu North, ma na faapaiaina e le Toeaina ia Lucky Slade. O le aiga fiafia na faataunuuina i le Malaeola Hall i Magele.



**Tautofi & Annie
Tuivasa**

O le Faaiuso o Tautofi e mai le EFKS a Manurewa ao lona faletua o Annie e mai le EFKS Ranui. O le aso fiafia lona lua, o le Aoao Faaiuso ia Geoffrey Fuimaono ma le faletua ia Daphne. Na faataunuuina lo la faamoemoe i Brisbane Ausetalia i le Malunala o le Ekalesia Katoliko (The Church of the 12 Apostles, Jindalee) ma na faapaiaina e le Afioga i le Sea Fa'asinoti Kuiniselani, Rev. Kolani Togafau Fiti. Na fesoasoani ai le susuga i le Toeaina ia Lance Tautiepa (FT) i talosaga. Ao le upu mo le ulugalii fou na saunia e le Susuga i le Faifeau Faiaoga Dr. Taipisia Leilua. Na faaauau leni fiafia i le Hall a le Lighthouse Forest Lake Suburb. Na faaauau leni fiafia i le Lighthouse Community Hall Forest Lake.

MALUA JOURNAL 2019

"Aua o lo o ola le afioga a le Atua, o loo matua galue foi, o lo o sili foi lona maai i pelu uma e faatau maai itu, o loo vaevae foi e oo lava i le vavaeeseina o le loto ma le agaga, o gaugatino foi ma aano o ivi, o loo faamasino foi i manatu ma filifiliga o le loto"
Eperu 4:10.

Ua mama i oa mama i taloa le sa o Samoa. Ua tau mai luma tau mai tua le anoanoa'i o faafitauli ua matagi taumuaia ai le faigamalaga a le atunuu ma ona tagata. O faafitauli ua le mafai ona alofia le afaina ai o le ola o le Ekalesia ona o lona valaauina mai le Atua. E le gata ua afaina le soifua tapua'i ma le soifua faa-le-agaga o tagata, a ua papa'i foi i vaipanoa uma o le ola ma afaina ai le soifuaga lautele o tagata. Ua ilo ve'a ma ua aliali foi le tetea ina ua manino le mata o le vai, i le mataupu i lafoga a Faife'au e pei ona faamalosi e le Malo e ala i lona malosi faa-le-tulafono. Ua manino foi le tuua to'atasi o le EFKS e ona uso a Ekalesia ona o mafuaga ua na o le Atua na te silafia. O lea la ua i aao o Faamasino ma le Ofisa o Faamasinoga le mataupu, ma ua leai foi se toe solomuli o le sa o le Ekalesia i le faamoemoe e tusa ma i'uga a le Fono Tele. A e tatou talia pea ia lupe o maunu a o tuu tasi i le Atua le tofa ma le faautautaga mau a Tama ma le Au-faigaluega Faife'au a e maise le aoao o le Ekalesia, ina ia tau i manu le faamoemoe.

O tusiga ua tuufaatasia i le lomiga o leni tausaga, o molimau faatuatua i afioga a le Atua ma le talitonuga, o afioga e le gata ina ola, a e galue foi, atoa ma le mautinoa o lona maamaai i ona itu uma, se'i faamafanafanaina ai finagalo o le fanau faatuatua a le Atua, o loo tapua'i ma tatalo a o fagatua ai le Ekalesia ma le Malo i leni vaitau. Pau lea o le toomaga o le Ekalesia, ua na o le mana o Iesu Keriso le Ao o le

Ekalesia, o le Atua ua liutino tagata mo le faaolataga o lana fanau ma mea uma na ia faia i lona alofa tunoa tele. O ana afioga foi ua molimau ai le tusitala o le tusi i le au Eperu, e ola ma galue aua o le Atua lava o le Atua soifua ma e galue foi, mo le ola manuia o lana foafoaga aoao. O afioga e maamaai ona itu uma ma e ulu e le gata o gaugatino ma aano o ivi, a e faapea foi i loto ma agaga. O afioga e amiotonu ma ua faapa'iaina, e le faailoga tagata ma e le faafeifeina foi ese tagata, a e ululu matafolau i vaipanoa uma ma luluina ai faavae o le ola, ma liuaina ai loto ma agaga i le ola faafouina mo le Atua ma lona finagalo.

O le tele o tusiga ua aga'i tonu i le mataupu o Lafoga (Tax), se'i tau autalaina ai a'oa'oga a le Tusi Pa'ia e faatatau i lafoga, atoa ma se silasila faa-mataupu silisili ma le talafaasolopito, aemaise ai le faatinoina i faiva alofilima o le galuega faafaife'au, i le soifua tapua'i ma le soifua galulue o le fanau faatuatua a le Atua i lana Ekalesia. O le tatalo a le susuga i le Pule, Rev. Maafala Lima, ma le Kolisi o Malua, ia faamanuiaina le faitau a le mamalu o le Ekalesia, ma ia fai ma sao faa-le-agaga o Malua i le soifua tapua'i ma le soifua auauna o le Ekalesia faapea Samoa atoa.

Ua matua tatau ma talafeagai ona faitau tagata uma o le Ekalesia i nei tusiga ua tuufaatasia i tausaga uma. O loo maua i le ofisa o le Kolisi lomiga e le gata o leni tausaga a o tausaga foi ua mavae.

Komiti:

Dr. Arthur Wulf FS
Dr. Vaitusi Nofoa'iga FS
Dr. Taipisia Leilua FS

AOAOGA A LE FANAU

AOGA ASO SA

Talofa lava, o le ripoti lenei o le Aoga Aso Sā i le Kuata muamua ua mae'a atu. O le taitai o le Aoga Aso Sā o le susuga i le faafeagaiga, le Pule o le Kolisi. E to'asefululua a'oa'o faaiuso ma faletua o faaiuso e to'a valu o loo avea nei ma faiaoga Aso Sa, i lalo o le taitaiga a le faletua o le faafeagaiga, le faletua ia Lalokava Limā, ma susuga i faletua o faia'oga e to'afitu. O i latou nei, Maria Samuelu, Lemāu Palaamo, Malavai Alama, Neda Puaina, Elena Petaia, Alofa Crawley ma Tupe Isara.

E lima vasega e pei lava ona masani ai, Vasega Amata (4-7 tausaga), Vasega Laiti (8-10 tausaga), Vasega Feololo (11-13 tausaga), Vasega Matutua (14-16 tausaga) ma le Vasega Matutua Faapitoa (17 tausaga agai i luga) ma o lo'o faatino lava mataupu e fua i le matutua o tamaiti.

O le Aso Sa o le Laupama o lenei tausaga sa faataunuuina lea sauniga i le Fale Iupeli fou. Ma o se taimi muamua lea o le Aoga Aso Sa ua agai atu ai le solo masani a tamaiti ma a latou laupama, ma pepese ma alalaga, seia taunuu i le stage ma faatino a latou pesepesega.

O le polokalame o le Eseta o lenei tausaga, sa faatinoina e faiaoga Aso Sa ma le vasega o faaiuso i le afiafi o le Aso Lua, 16 o Aperila i le itulā e 7: 00. Ma o lea polokalame sa faasalalauina tuusa'o e le EFKS TV mo le silasila maimoa a le mamalu o le atunuu ma le Ekalesia Aoao.

E momoli atu ai le faafetai tele i lau susuga i le Tamā Faifeau ma lou faletua, faletua o faia'oga, ma le mafutaga a faiaoga Aso Sa mo galuega o lona kuata ua maea atu. Faamalo le galulue, malo le tauata'i. Ia manuia le tu'uaga, manuia fo'i le alo atu i le Fonotele.

Faulalo Kennar

(Failautusi Aoga Aso Sa)

MALUAPAPA AOGA AMATA

O le viiga ma le faafetai i le Atua, ua maea le kuata muamua i galuega a le Maluapapa Aoga Amata i Malua i lenei tausaga 2019. O lenei galuega e i lalo o le faamalumaluga a le Alii Pule ma lona Faletua, faatasi ai ma le lagolago a le Faletua o le Faiaoga ia Mile Nofoaiga. Na amatalia le aoga i lenei tausaga i le Aso 11 Fepuari 2019. O taimi o le aoga, e amata i le 8.30am ae tuua i le 11am, mai le aso Gafua i le Aso Faraile. O le aofaiga o tamaiti aoga e 20, e toa iva tama ae sefulu tasi teine. O tamaiti auai o le Aoga Amata, o alo lava o a'oa'o ma faletua. E tofia e le faletua o le Pule ia faletua o a'oa'o, e galulue i le Aoga Amata i kuata taitasi.

O aoaoga ma polokalame fai i lenei kuata sa mulimulita'i i le taiala o loo faaogaina e Aoga Amata i Samoa nei. O ia polokalame e iai ona manatu autu e fai ma taiala. Faataitaiga, o le a'oa'o ina o mataupu i soifuaga lautele i le kuata muamua 2019, o lona manatu autu o le *"TAGATA"*. E aoaoina fanau i le *Alafapeti (Alphabet) faa-Samoa ma le faa-Peretania; O Fuainumera* e pei o le faitauga mai le 1 e oo i le 10; *O lanu eseese* e pei o le piniki ma le pa'epa'e; *O Siepi (shape) eseese* e pei o tafatolu ma faa-tafafa. E faia folasaga (presentations) a faletua o a'oa'o i vaiaso taitasi, mo ia polokalame faa-le-aoaoga mo aso taitasi

mo tamaiti, i lalo o le vaaiga a le Faletua Faiaoga ia Mile Nofoaiga. O le faamoemoe autu ia iloa e tamaiti vaega faavae (basic facts) o ia mataupu eseese a'o lei ulufale i aoga tulaga lua (primary school).

O nisi faatinoga o ia polokalame e ave ai fanau e asiasi ma matamata i nisi o nofoaga o loo aoaoina i mataupu fai. Faataitaiga: O le lesone o le taua o nofoaga e faatino ai lotu ma tapuaiga i Aso Sa, sa asiasi ai fanau i totonu o le falesa, vaai i tulaga o le pulelā, piano ma itu eseese e nonofo ai le aulotu. Na faatino foi le polokalame o le Eseta. Ole vaiaso atoa lea na faia ai galuega faatino (activities) e faatatau i le Eseta. Faataitaiga: basket weaving for eggs, gluing cross puzzles etc. Faatino ai foi e faiaoga se tala e uiga i le Eseta ma faia ai pesepesega a tamaiti i le 'Toetu o Iesu.' Na faauma le faamoemoe i le Easter Egg Hunt a tamaiti.

Na asia e le 'National Council of Early Childhood Education for Samoa' le matou Aoga Amata i lenei kuata. Na faailoa mai ai lo latou agaga fiafia ma le agaga faafetai ona o le faatinoga o galuega fai a le Maluapapa Aoga Amata. O se tala fiafia lea mo galuega fai a le Maluapapa Aoga Amata i lenei kuata ma lona agai i luma.

O le Aso Tofi 18 Aperila na tuua ai le Aoga Amata a Malua mo lenei kuata.

Ma le faaaloalo lava, **Pekina Matalevai Laufiso**

MALUA STUDY CENTRE (MSC)

Ia foi lava le viiga i le Atua ona o fanau a Malua aemaise o lo latou fiafia pea i polokalame o loo ofoina mo i latou i Malua nei. O lenei foi tausaga 2019 na toe amatalia ai le Malua Study Centre e ala i polokalame faamasanai ma faalauiloa (Orientation programme) mo alo ma fanau uma faapea ai ma faiaoga. E aofia ai i nei faiaoga nisi o Faiaoga ma Faletua, Aoao ma Faletua. Na faia faapitoa lava le po muamua e faatasi ai faiaoga uma. Ao le po lona lua na faatoa faatasi ai tamaiti. O nei po e lua na saunoa faamalosiā ai lo matou Taitai, le Susuga i le Alii Pule i faiaoga faapea ma tamaiti.

Na ia faamamafaina ai i faiaoga le taua o lenei auaunaga mo fanau. Ae mo tamaiti ina ia faaoga tataua avanoa e saili fesoasoani ai i faiaoga ma sutesue atili ai ia latou meaaoga. E tusa ma le 50 le aofai o tamaiti na omai i lenei faalauiloa ma le faamasani ma o le toatele lava o fanau a le tausaga muamua. O se fiafiaga tele lava mo le Alii Pule ma faiaoga o le vaaia lea o le agai i luma o le ola aoaoina o fanau aemaise fanau matutua ua ausia le Iunivesite. Ao le fiafiaga tele lava o le vaaia o le suiga o fanau laiti ua mafai ona loto tetele e fesili mo se fesoasoani. O le vaega aupito i alualu i luma lea o le Study Centre ua molimauina. Ua le toe maua le matamuli o fanau e saili fesoasoani i faiaoga ia latou meaaoga. O le mea sili ua maua e tamaiti lenei uiga fou ae ua toe faaopoopo mai le faitau aofai o faiaoga mai sui o le Tausaga Muamua. Aua o le talitonuga lava o loo unai i tamaiti, o le tamaititi e fesili e maua tali, o tamaiti e maua tali, e faateleina lona iloa.

E fiafia lava e mataituina le gasologa o le taumafai o le fanau i lenei tausaga ma ni tulaga lelei latou te ausia i

aoga. O lea e lagona ai lava le faagaetia ona o le lagolago a Susuga i Faiaoga ma Faletua o le Kolisi, faapea Aoao ma Faletua uma o loo faaavanoaina taimi e fesoasoani ai i nai fanau. Ao le faafetai tele lava e

MALUA LITERACY / MALUA FALETUSI MO TAMAITI

E faafetaia le alofa o le Atua ona o lea ua mae'a le matou pokalame mo lenei kuata. O le naunautiga lava ia, ina ia aoga lenei pokalame mo le fanau a Malua. O le faamoemoe maua luga o lenei polokalame, ina ia fesoasoani, ma faaleleia atili le faitau tusi o alo ma fanau a Malua, i le gagana Peretania, e pei ona aoaoina ai i Aoga tulagalua faapea ma Kolisi maua luga. Na amata lenei polokalame mo lenei tausaga i le Aso 04 o Fepuari. O ta'ita'i o lenei pokalame e aofia ai o faletua o faiaoga o Sina Wulf, Lotu Latai, Amelia Setefano ma Lemau Pala'amo. E to'a lima sefulu ma le lima (55) tamaiti mo lenei vaituuaga. E to'a lima (5) tamaiti fou ua atoa le ta'i lima tausaga, ma le to'a luasefulu (20) tamaiti fou o fanau o A'oa'o ma Faletua o le tausaga muamua. Ua matou molimauina le alofa ma le agalelei mai o Le Atua, ona o auala eseese ua maua mai ai tusi fou mo le matou polokalame. E faafetai ai i le Susuga i le Fa'afeagaiga Aukilani Tuiai ma le Faletua ia Maunu'uese ma si o la alo Samuelu, ona o tusi sa agalelei mai ai mo le Malua Literacy.

molimoli mo lo matou taitai, Le Susuga i le Alii Pule faapea le Faletua i lo la faamalosiau ma le lagolago malos i lenei vaega taua o le aoaoina o fanau a Malua.

E faafetaia foi le Susuga i le Fa'afeagaiga Panama Pouono ma le Faletua ia Herema, ona o nisi foi tusi sa foai mai mo lenei polokolame. O le matou tatalo, ina ia toe fa'atumu e le Atua mea uma ua fa'agaogaina ona o le agalelei mai o nisi o le Aufaigaluga Paia a le Atua. O foliga vaaia o le fanau pe a vaai i tusi fou ia, o le fiafia ma le olioli ona ua i ai tusi eseese ua mafai ona faasolo i ai la latou faitau. Ua atili ona faaosofia ai lagona o le fiafia e faitautusi i le fanau. O lo'o saili pea sponsors faapea ma donations mo isi tusi fou, i taimi uma o lenei tausaga aua lenei polokalame taua mo le fanau. E faamoemoe ma tatalo pea i le Atua, ina ia fesoasoani mai nisi e taua i isi tusi fou o loo manaomia lava, faapea ma ni faila, ma fatatusi fou. A o le taimi nei, o loo galulue pea ma faaogaina alamanuia (resources) o loo maua i lea taimi ma lea taimi. E faafetaia ai pea le Alii Pule o le Kolisi, ma le Faletua, faapea ma Faletua o Faiaoga, ma matua o fanau uma, ona o le lagolagoina o le matou polokalame i vaaso taitasi, aua le lumanai manuia o a tatou fanau. E faafetaia foi Faletua o Aoao o loo fesoasoani tele i le fa'amaopoopoina o lenei polokalame.

Lemau Pala'amo

TAALOGA AOAO

E faamua pea le vi'iga ma le faafetai i lo tatou Atua, ona o lona alofa ma lona agalelei i lo outou soifua ma lo matou nei ola. Ua faai'uina foi feau ma galuga o lenei kuata, aemaise ai le polokalame ta'alo a le Kolisi i lenei kuata.

A 'o se ootoga lenei o tala o taaloga a A'oa'o mo lenei foi kuata. E lua ta'aloge e ta'aalo ai A'oa'o. O ta'aloge o le Lakapi pa'i ma le Soccer ma le ta'aloge o le Kirikiti Faasamoa. O taaloga sa vaeveaina A'oa'o i ni 'au se lua, o le **Uliuli** ma le **Paepae**. Ao le tuā fale e fa(4), ole **Meamata**, **Samasama**, **Mūmu** ma le **Moana**. Sa molimauina pea le ta'aalo fiafia ma le finafinau o A'oa'o i Aso Tofi uma o taaloga. O se vaega tāua o le ola a'otauina, e saili ai le soifua maloloina o A'oa'o, ao tapena ai mo le galuga faa-faifeau mo le lumanai. I le fa'ai'uina ai la o taaloga lenei kuata. O taaloga ua tulai mai ai le 'au a le lanu **Uliuli** e avea ma siamupini o lea taamilosaga.

Ma o le fa(4) ai foi nei tausaga, o manumalo pea le au a le lanu **Uliuli** i fa'alagamaea i le lumā fale. O le tuā fale i le Kirikiti Faasamoa, ua manumalo ai, mo le ulua'i taimi le au a le lanu **Mūmu** i le talita sa umia e le lanu **Meamata**. O se fiafiaga tele foi lea i le kapeteni ma le au a le lanu **Mūmu** ina ua umia le talita mo lenei kuata. O loo molimauina foi le fa'atuputupula'ia o le lelei o le ta'aalo a A'oa'o i lea foi fa'alagamaea o le Kirikiti faasamoa.

Ma o le fa'ai'uina foi lena o a tatou tala o ta'aloge mo lenei foi kuata. E iai le faamoemoe tatou toe feiloai i le la kuata i la tatou polokalame ta'alo. A ia manū tele ina le aga atu o le tatou Kolisi mo le faiga tu'uaga, iai pea le agalelei o le Atua i lo outou soifua ma lo matou nei ola.

Falealii Afamasaga (Sui o le Komiti)



ATINAE A LE KOLISI

Togā Laau Fai Sua (Kapisi, Tamato, Kukama etc)

E tumua pea le viiga i le Atua ona o lana pule faasoifua i lo tatou ola. Ao o le ripoti lenei o le faatoaga fualaauaina a le Kolisi i Maluapapa nei 2019, i lalo o le taitaiga a le susuga i le faifeau faiaoga foma'i ia Samasoni Moleli. O le masina lenei o Me, ua atoa i ai le tausaga talu ona faavaeina le faatoaga fualaauaina. O se atinae ua iloga lona taua i le fofoga taumafa. Ua mafai e lenei atina'e ona tali manaoga tetele, e pei o aiga o mafutaga faaleaiga (fellowship) a le kolisi, o taligamalo, ma faamuli a le kolisi. Sa faasoa atu foi i faafeagaiga ma isi Faalapotopotoga e au iai le faasoa. Sa faatau atu foi i le mamalu o le Atunuu ma maua ai tupe e faaauau ai lenei atinae. E tagi lava i lima lenei vaega ma le faamoemoe o le tagata e toto ao le Atua na te faatupuina. O le tala fiafia o loo faaauauina lava lenei atinae.

O le itu lelei o lenei atinae e galueaina lava e aoa'o. Tele metotia ua matou maua i lenei atinae. Ua mafai ona maua tomali i le suatia o le elele e fai ai peti (bed), tomali i le faamiliga o fatu laau (seedling), o le siiina ma le totoina. O tomali i le fuiina (irrigation) seia oo lava i le seleseleina (harvesting). Ou te molimau foi e le'o se galuega faigofie. E usupo i vaveao, o le vevela o le la i le aoauli, peitai, matou te le faavaivai ai ona e tele ni aoaoga e maua mai ai. Aoaoga muamua, e tele faataoto a lo tatou Alii Faaola e faatatau i fatu laau ma le galueaina o le elele. O mataupu ia o loo aoaoina o latou mataupu silisili i potuaoga, ae o lona faatinoina (practical) o le itu taua lea o loo faatinoina i lenei atinae.

Aoaoga lona lua, e mafai ona faatusa lenei faatoaga fualaauaina i le ekalesia. Matou te aoaoina mai i lenei atinae, pei lava lenei faatoaga o se faatoaga o agaga. E manaomia le vai, o le faalelei elele, tausii ma teuteu, aveese le vao faalafua, puipua mai manulele, iniseti ma faama'i aemaise suiga maaleale o le tau.

O aga ia ma metotia o loo tapu'e iinei Maluapapa i ona tua Maota. E aoga mo le galuega i le lumanai aua e pei lava le tagata soifua o laau. I le ma lenei, a maua ni o matou nuu i le lumanai e mafai ona faaogaina ia metotia e atinae ai aulotu.

Faia lenei ripoti ma le faaaloalo tele.

Vaega a le Fualaauaina Maluapapa 2019.

Komiti o Maumaga: Ripoti o le Vaituuaga Muamua

E viia pea le agalelei o le Atua ona o lona tamaoiga ma ana meaalofo e ala i faatoaga ua galueaina i totonu o le Kolisi, ole upu moni o loo molimauina pea le sologa manuia o maumaga, e ala lea i le tele o le meaai e iai talo ma ufi, e avagalima ai le tautua ma le auaunaga i soo se faamoemoe. O le masina o Aperila i lona faaiuga na faataunuuna ai le asiasiga e tai 2000 tiapula a le auaiga, o le tala fiafia mo le komiti na ausia uma lea numera faatapula faatasi ai ma faasiliga. I le faaauauina pea o galuega a le komiti, na toe finagalo ai susuga i faiaoga o

loo taitaiina lenei vaega ina ia toe faatinoina le asiasiga ile masina o Me ae lei tuua le aoga mo lana malologa i lenei vaituuaga o le asiasiga e tai 500 tiapula, ma na ausia uma foi e auaiga le numera tapula faatasi ai ma faasiliga. Ia viia pea le Atua i lana foai, e ala i faatoaga. O se ripoti atu lena mai le vaega o maumaga i lenei vaituuaga, ma le faaaloalo lava.

Komiti o Maumaga 2019



Vaega a le Pa Povi

O atinae e pei o manu papalagi ma faatoaga a le Kolisi, o isi ia vaega taua o le soifua aotauina o alo ma fanau a le Ekalesia e lu'iina ai le tino, mafaufau ma le agaga. Ua masani foi le lavalao ma le toatele o le mamalu o le aufaigaluega faifeau i aga a le Kolisi pe a ta'u se galuega mo le pa povi sei tulou aua e le faigofie. E ati uma i luga le vao leaga ae toto le vao lelei. E sefulu pa na amataina ai le atinae lafu manu papalagi lenei mai le amataga. Peitai i le tolu pe fa tausaga talu ai na faaogaina ai loa isi pa e 4 mo le faato'aina aua maumaga. I le taimi nei la, e 6 pa o loo faaavanoaina mo le lafu povi. Ma ua i ai foi se faamoemoe ina ia tuutiitia le aofai o manu fua i fautuaga mai le ofisa o lafu manu i Avele. O lea la e i ai le aofai o manu e 19 ma ua

talafeauga lelei ma le tuualalo a le ofisa. O loo faatinoina pea e aoao galuega e le gata o le pa ia malu, a ia toe faaleleia foi le sikokiā mo le faatinoina o galuega pe a faalalo se manu a le Kolisi. O loo taumafai pea ina ia tumau le maloloina o manu o le pa, ma o loo fesoasoani malosi le Kolisi i le tausii lelei ma le faamamaina o le pa. E toa 7 aoao o loo galulue i le vaega a le pa povi. I lenei la avanoa taua e faailoa ai le faafetai tele a le vaega a le pa povi i le susuga i le Alii Pule faapea le Kolisi atoa ona o le fesoasoani ma le lagolagoina o le taumafaiga o lenei foi atinae taua o loo tua i ai le Kolisi i taimi e moomia ai. Ia manuia le Fonotele o lenei tausaga i le alofa o le Atua.

I le Ava ma le Fa'aaloalo Lava,

Fa'asao Ma'a.

FAAMULI TAUSAGA MUAMUA

I le ava ma le fa'aaloalo tele, e tuuina atu ai lenei ripoti puupuu aua le silafia i tulaga uma ma fa'atatau sa feagai ma le Vasega Tausaga Muamua 2019 i la latou fa'amuli muamua i lenei Kolisi i le vaitau o le Eseta.

E fa'aso o lea fa'amoemoe, amataina i le afiafi o le Aso Tofi 19 Aperila se'i o'o i le afiafi o le Aso Gafua 22 Aperila 2019. O le fa'amuli sa ta'ita'ia lava e le Susuga i le Tamā Pule ma lona Faletua, fa'atasi ai ma le lagolago sua a Susuga i Faiaoga ia Filemoni Crawley ma Melepone Isara ma o la faletua ia Alofa ma Tupe. O le tausiga ma le gasecina o taumafataga sa fuafuaina lava e le laulau fa'atasi ai ma le lagolago a a'oa'o ma faletua uma o le Tausaga Muamua. O le tapenaina o le Fale Iupeli ma le Senetenari mo Tapuaiga ma toonai sa nafa lava ma faletua i lalo o le taitaiga a Susuga i Faletua o faiaoga. Na sologa lelei faatinoga uma i fe'au ma galuega na feagai ma a'oa'o ma faletua. Leai se mea na fa'aletonu pe tauto'ai ai tapenaga, tu'u taimi mea uma ma talafeagai fo'i ma fa'atinoga. Sa fa'auauina foi tiute tumau fa'ale-kuka tumau o le fa'amamaina o le otaota ma le fafagaina o mea i tuā'olō a le Kolisi. Sa fa'atinoina foi faigālotu i taimi masani fa'apea foi leoleoga masani o le po.

Sa faatinoina lava sauniga Masani o le Aso Maliu faapea ai ma le Aso Sa Toetu. O le sauniga lotu ma le Faamanatuga o

le Aso Maliu (19.04.19) na taitaia lava e le Tama Pule ae fesoasoani iai aoao o Colin Faletese (Tusi Paia), Vite Kalepo, Niutuiatua Onesemo, ma Falevaai Ah Kuoi (Tatalo). O le faletua ia Ataata Leatigaga sa faia le tala mo le fanau. O le taina o le okeni o le faletua o Jedda Korio. O le Susuga i le

Faiaoga ia Melepone Isara sa ta'ita'ia le sauniga lotu i le Aso Sa o le Toetu (21.04.19).

Fa'afetai i le Atua mo le malosi ma ana fa'amanuiaga e tele i so'o se vaega na manuia ai le fa'agasologa o mea uma. Na matua lava le fa'asoa, leai se isi na gasegase pe fa'avaivai, fa'ai'uina mea uma i le faifia.

O le mea moni, ua matua tele le aoga o lenei faamuli mo i

matou. E sauni atu ai mo le faatinoina o lenei foi vaega taua o le soifua aotauina i totonu o Malua. E le gata i lea ua maua ai foi le masaniga ma le auuso o lenei vasega o lea faatoa masani ma feiloai mai i lenei aai.

E momoli ai foi le agaga faafetai tele i lo matou taitai, le Susuga i le Tamā Pule ma lona Faletua, fa'apea ai Susuga i faiaoga ia Filemoni Crawley ma Melepone Isara ma o la Faletua ona o le aoaoina ma le tapenaina o lenei vasega i itu uma o mea tau faamuli. Faamanuia tele le Atua.



FALE FOU I MALUA

Ua iai nei foi se maota faaopoopo i le aai i Maluapapa o se tasi o Pulega fou mai Niusaelese Ausetalia. O maota lava e faamautu i ai le Pulega i vaitau o le usuia ai o le Fonotele a le Ekalesia i tausaga taitasi. O lenei Pulega fou ua faaigoaina ia Niusaelese Tutotonu ma o loo i lalo o le taitaiga a le Toeaina ia Matelili Leaana. E lima aulotu o loo iai i lenei Pulega. O lenei maota o loo fausiaina i le

ala agai i le Atinae a le Ekalesia ma o loo ogatotonu i le maota o Pulega a Apia ma Kuiniselani. O le Aso Toonai 11 o Me na

tatala aloaia ai lenei maota e ala i se sauniga lotu. O lenei sauniga lotu e faapaiaina ai lenei maota na taitaiina e

le Susuga i le Alii Pule o le Kolisi i Malua ia Rev. Ma'afala Limā. O se galuega ua molimauina le matagofie ma le telē aua o fausaga lava faanei-onapo. Momoli ai le faamalo i le Susuga i le Toeaina ia Matelili Leaana, le nofo a Faafegaiga faapea le paia lasilasi o le Pulega ona o lenei galuega tele ma le taua. Ia faafetaia le Atua i galuega lelei ua faia, ma ia viia ai Lona Suafa Mamalu.



FA'AU'UGA LONA IX AOGA TUSI PAIA MALUA 2019

Lisi o le Au Fa'au'u 2019

Certificate in Theological Studies - Level IV

1. Autagavaia Salati Sālū Finauga
2. Blessings Matauias Asotasi
3. Fa'alavanē Si'u Fautua
4. Fa'alogo Ta'amilosaga Tapuala Lolagi
5. Faapaologa Fabie Viali
6. Fepulea'i Attila Ropati
7. Fiu Logologo Seiuli Asotasi
8. Laulu Unasa Taiese Soanai
9. Le'uo Alani Faiai
10. Loloma-mai-Viti Esera Paulo
11. Lomi Tomane
12. Lusiano Lafao Fa'asami Leauanae
13. Magele Hoe Viali
14. Misiperetiso Lolenese
15. Muliagatele Tavete Tusani
16. Mulitalo Howard Fidow
17. Namulauulu Lauaki Fuatau
18. Namulauulu Makesi 'Aiva
19. Olioliilealiiēaunoa Faletose
20. Palepua Solaese
21. Papāli'i Li'o Ta'eu Masipa'u
22. Pesetā Luteru
23. Sauniatu Niu
24. Solomona Semisi
25. Tautele Elisara
26. Togisia Fatu Malaefono
27. Vaigā Siaki Ualesi
28. Vite Kalepo

Aoao Fesoasoani, Vailoa, EFKS
 Tagata Lotu, Vaivase/Moataa, Worship Centre
 Aoao Fesoasoani, Lano, EFKS
 Tiakono, Salelologa, EFKS
 Tagata Lotu, Lotopa, Worship Centre
 Tagata Lotu, Vaitele Fou, Peace Chapel
 Tagata Lotu, Vaivase, Worship Centre
 Aoao Fesoasoani, Lalomalava, EFKS
 Tagata Ekalesia, Vaitele, EFKS
 Tagata Ekalesia, Vaivase Uta, EFKS Tanoaalei'a
 Aoao Fesoasoani, Vaivase Tai, EFKS
 Tagata Lotu, Faleula, Katoliko Roma
 Tagata Lotu, Lotopa, EFKS
 Faiaoga Aso Sa, Tafua, EFKS
 Tiakono, Savaia, EFKS Levili
 Aoao Fesoasoani, Motootua, EFKS
 Aoao Fesoasoani, Salelologa, EFKS
 Tagata Ekalesia, Fogapoa/Vailoa Tai, EFKS Vailoa Tai
 Faiaoga Aso Sa, Leufisa, EFKS
 Failauga Faamaoni, Faatoia, Ekalesia Metotisi Matafele
 Tiakono, Sapapalii, EFKS
 Aoao Fesoasoani, Puapua, EFKS
 Taitaipese, Tafua, EFKS
 Tagata Ekalesia, Apia, EFIS Apia/EFKS Samamea Fagaloa
 Aoao Fesoasoani, Fogatuli, EFKS
 Aoao Fesoasoani, Fa'ala Palauli, EFKS
 Tiakono, Saipipi, EFKS
 Aoao Malua, Malie, EFKS

Diploma in Theological Studies - Level V

1. Peioseia'aemoemaugaoleatuolo Doreen Fa'auā Sagaga Tagata Lotu, Moataa, EFKS
2. Elita To'oala Tagata Ekalesia, Fagamalo/Iva/Moataa, EFKS Levili
3. Faavaoga Talalelei Aoelua Aoao Fesoasoani, Faiaai/Uafato Fagaloa, EFKS Ketesemane Fou
4. Lemau Pala'amo Faletua Faifeau Faiaoga Malua, Fasitoo Uta/Aleisa, EFKS
5. Lotu Salesulu Latai Faletua Faifeau Faiaoga Malua, Apolima/Lepa, EFKS
6. Mile Nofoaiga Faletua Faifeau Faiaoga Malua, Afega/Malie, EFKS
7. Pesetā Malelega Tuisalega Aoao Fesoasoani, Nuu Fou, EFKS
8. Silaumua Konelio Failandi Tagata Ekalesia, Levili, EFKS
9. Taoauvao Teveli Aoao Fesoasoani, Nuu Fou, EFKS

Certificate in Theological Studies - Level IV & Diploma in Theological Studies - Level V

1. Foa'imea Tavita Foa'imea Aoao Fesoasoani, Nuu Fou, EFKS
2. Mulitalo Tini Aoao Fesoasoani, Vaiala, EFKS
3. Pale Mareko Failauga Faamaoni, Vaitele Fou, Ekalesia Metotisi
4. Tologatā Tile Lei'a Tiakono, Falelatai, EFKS



Sui Aooga o le Aoga Tusi Paia Malua



Pule, Faiaoga, ma le Vasega Faauu 2019

TAALOGA FALETUA

O le faaaauina o taaloga, o se tasi lea vaega taua o le Soifua a'otauina o le faaatoaina o le tagata atoa, i le fa'a-le-tino, mafaufau ma le agaga. O aso Tofi taitasi o le aso lea ua atofaina mo ta'aloga a a'oa'o ma faletua. O ta'aloga a faletua o le voli polo e pei ona sau ai. Ua vaevaeina faletua i lanu e fa ma ua faaigoaina, Nuulua, Nuulopa, Namua ma Nuusafee, o au lava ia e taaalo ai i kuata e tolu. O taaloga o se vaega e fefaasoa'i ma mafuta ai, ese mai potu aoga. E eseese lava faiga i le soloai mai o tausaga faaiuso i le faataotoga o taaloga volipolo, i au

ma le faaigoaina, ao lanu masani sa faaigoa ai, o le mu-mu, meamata, moana ma le lanu samasama.

O le upu lava ua masani ai aoao ma faletua, o aoga mea uma. I le tapenaina i la le tino, le mafaufau, ae sili ona mataalia i le Soifua Fa'aleagaga.

Faafetai,
Dorothy Simati (Komiti Taaloga)

VAAIGA ESEESE I LE KOLISI



VAAIGA ESEESE I LE KOLISI



Komiti o le Maluapapa

Makesi Neemia, Alesana Pala'amo, Reupena Maulolo,
Sega Asafo, Peniamina Toailoa, Kapeni Matatia, Hobert Sasa
Malua Theological College
www.malua.edu.ws © 2019